



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

India-i 2036 Olympics ayongzüksü renema lir: Amit Shah

Senator kar tepset nung ajungtsü: Rodrigo Duterte

VOL. XXII ISSUE NO. 122 (ADOK 122) DIMAPUR KÜPTOKNÜ (SATURDAY) TSÜKLAI (FEBRUARY) 15, 2025 ₹ 5.00

CM Rio-i lanurtem dang state temabai ajungkettsü ayongzük

Dimapur, February 14, 2025 (TYO): Chief Minister Neiphiu Rio-i Hombarnü Nagaland nung lanurtemi state jenjang temabai ajungkettsü ayongzükogo.

St. Joseph University indang 4 buba convocation ceremony nung CM Rio-i "tanü ya benjungtepba anogo, nüma atangba anogo aser tongtipangsa mera tasen agiba anogo lir" ta ashi.

"Nagaland nung lanur aikati agri, handloom aser entrepreneurship nung tayongzükba kokteta mapa tulu inyaka odor. Lanurtemi aremzükba, purapitetba aser tasü aitba ajanga local industries jenjang melenshiogo. Nenoki tajung akümtsü merangang aser

iba sülen takok anidaktsü" ta Rio-i ashi.

"St. Joseph University-i higher education nung shilem tajung agiba atema tenüngsang agütsür. University nung programs 40 tema lir aser Nagaland nung Physical Education benokba mezüngbuba reju lir. Iba reju ajanga Nagaland nung tarutsü lennirtem anitettsü" ta pai ashi.

"Graduate asüba kaketshirtemi temulung ulushitsüla, melenshitsüla aser ajemalutsüla. Nenoki loktiliba asoshi mapa inyakang aser lokti asoshi nüngdakbapurtem akümtsü merangang" ta CM Rio-isa ayongzük.

WC, NNPG-i shishilembar dang tamangba yimsü tenüngtem agientsü tuyur

Dimapur, February 14, 2025 (TYO): N. Kitovi Zhimomi-i aniba Working Committee, Naga National Political Groups (NNPGs)-i Nagaland nung shishilembar dang tamangba yimsü tenüng amshia tajangzük magitsü tetuyuba agütsüogo.

Hopta ka tsüngda shishilembartemi parnok dokantem nungi tamangba yimsü tenüng amshiba agientsü mapang züngzüksür ta Media Cell, WC/ NNPGs sangdong ka nung metetdaksü.

February 14, 2025 nü külem senden ka amendang iba lemtet agiogo ta parnoki ashi.

Shishilembartemi Hindu Hotel, Muslim Hotel, Christian Hotel, Buddhist Hotel aser tanga tamangba yimsü tenüngtem amshiba agientsüla ta WC/ NNPGs-i tetuyuba agütsü.

Shishilembabaren nung tamangba yimsü amshia tajangzük bushiba noktangtsü atema ibe lemtet agi. Talisa iba inyakyim ajanga loktiliba nung meputep adokdaksür anungji hopta ka tsüngda shishilembartemi tamangba

yimsü tenüng amshia aliba ajak agientsüla, ta parnoki ashi.

Nagaland ya Khristantem teimba ser aliba state ka aser alima nung Baptist Christian tamanger teimtiba aliba lima ka ta züngshir. Yamai nübo teimba süaka Naga hungeri alima den apet democratic tangatetba nung alir aser Nagaland nung tamangba yimsü balala sadema amangdaksür ta WC/ NNPGs-isa ashi.

"Kijatemi pei pei tamangba yimsü amangtsü temeten amshir saka nija tajangzük atema tamangba maitsü amshiba ya majung kechiyong iba ajanga lokti sasep nung meputep adoktsü aser telongiem malitsü" ta parnokisa ashi.

"Shishilembar kari pei tamangba yimsü tesayuba den putepa makamaitertem yaritsü atema mapa tajung inyakba mesüra tenla agütsüba atema tenüngsang agütsür. Ibala inyakyim ya kanga tajung aser lokti ajungketer, ajisüaka kasa mapang tesayubatem den meputep inyaksangshiba ajanga timtem tulu ajurutsü" ta WC/ NNPGs-isa metetdaksü.

Minister Kenye-i Naga nunger longjemtsü nenshir

Chizami (Phek), February 14, 2025 (TYO): Nübertem aser political party tem tsüngda telongiem adokba ajanga Nagaland nung tebilemtsü aser talisa Naga yimten tebilemtsü koktetba nung yaritsü ta Power and Parliamentary Affairs Minister K G Kenye-i ashi.

Phek district kübok LJP (Ram Vilas) Chizami unit tanishir 54 den parnok sülen anidakertem Nationalist Democratic Progressive Party (NDPP) 17th Chizami unit nung adenba sentong nung Kenye-i iba olenjembi.

Alizüng aser taginübatem

kasa dang süaka Naga yimten teloktem loksaa aoba atema tebilemtsü abener ta pai ashi.

"Külemi longjemtsü aser tashitaiba akümtsü melen aasenok telok aika lemsaogo aser iba ya asenok atema majung. Asenok longjemra, ka kümra, asenoki telemtetba ka agitettsü" ta Minister Kenye-i ashi.

Nagaland Assembly nung MLA 60 prong longjema lir aser opposition maliba sorkar ka ama ketdangsür. LJP(RV) tanishirtem aser züngsemtem NDPP nung adenba ya telongiem aliba tamaittsü ka lir ta pai ashi.

Okadaki NPDA dang AB-PMJAY/CMHIS inyaka aotsü tuyur



Dimapur, February 14, 2025 (TYO): Gauhati High Court nung Kohima Bench-i Nagaland Private Doctors' Association (NPDA) dang Ayushman Bharat Pradhan Mantri Jan Arogya Yojana (AB-PMJAY) aser Chief Minister Health Insurance Scheme (CMHIS) maparen inyaka aotsü tetuyuba agütsüogo.

Nagaland nung activist S.T. Yapang-i tetsükdaksü kecha melii health insurance schemes inyaka aotsü atema Public Interest Litigation (PIL) benokba nung ajemdaker okadaki iba tetuyuba agütsüogo.

S.T. Yapang-i benokba PIL nung AB-PMJAY/CMHIS dak sendakba tebilemtsütem lemsatapa lir. Pai iba PIL ya Nagaland sorkar, Nagaland Health & Family Welfare, Nagaland Health Protection Society (NHPS), aser Future Generali India Insurance Company Ltd. (FGI) aser Nagaland Private Doctors' Association (NPDA) nunger anema benok.

Nagaland nung AB-PMJAY scheme ya 2018 nung tenzük aser iba sülen 2022 nungi state sorkari CMHIS den lokteper

inyaksangshia arur.

Iba maparen atema June 14, 2024 nü Nagaland Health Protection Society (NHPS) aser Future Generali India Insurance Company Ltd. (FGI) tsüngda Memorandum of Understanding (MoU) ka nung sign sütep. Ajisiüaka, January 2025 nung empanelled hospitals aikati FGI nungi senotsü mangur ta shia AB-PMJAY/CMHIS anena ayu.

Iba ajanga NHPS-i sangdong ka agütsüba nung empaneled hospitals kari ashikülak aser tim masüba mapa inyaker" ta shia liasü.

Department-i item onüktem asadangdar aser hospitals-i ashikülak mesüra tim masüba inyakba bushisüngdang ta NHPS-isa metetdaksü.

Iba atema Nagaland Private Doctors' Association (NPDA)-i February 11, 2025 nü February 15, 2025 nungi PMJAY/CMHIS services anentsüba osang metetdaksü. Insurance company nungi senotsü manguba ajanga anena atar ta parnoki ashi.

FGI-i payment terms/ agreement alema inyaker kechiyong claim settlement agir anogo 15 sülen senotsü

agütsütsü ta lateta lir ta NPDA-i ashi.

Empaneled healthcare providers kari mapa tamajung inyakba atema NHPS-i ashikülak mapa inyaker ta onok dak tai tongloksüba aitsür. Tenüng menük bener marutsüsa iba onük ya telung nung dang reprangshimsüba sernung masü anungji NHPS-i yimjak nung tatok meshitsüla ta NPDA-isa takhangba agütsüogo.

Kohima Bench, GHC nung iba ken o angadangdang NHPS-i FGI dang genuine claims atema senotsü agütsütsü shiogo saka parnoki ibaji meinyak ta metetdaksü.

Iba ken o angadangba sülen justice LS Jamir aser justice Kakheto Sema na adenba bench-i taruba hearing magi tashi NPDA-i February 11 nü lemtet agiba sota atar ta tetuyuba agütsüogo. Iba ken o ya okadak tariba hopta pezü lir angadangtsü.

Kohima Bench, Guahati High Court-i Nagaland Private Doctors' Association (NPDA) dang ken o mangadang tashi public taginüba ama AB-PMJAY/ CMHIS maparen maneni inyaka aotsü tetuyuba agütsüogo.

Centre-i Nagaland renlok daksütsü tenangzükba lir: MoS Suresh Gopi



Union Minister of State for petroleum & Natural Gas and Tourism, Suresh Gopi-i Police House Chumoukedima nung senden ka amendang agiba noksa angur.

Dimapur, February 14, 2025 (TYO): February 14, 2025 nü Union Minister of State for Petroleum & Natural Gas & Tourism, Suresh Gopi-i Police House Chumoukedima nung District ketdangsürtem aser Department balala nung tekolakpurtem den ajurutepa senden ka menogo.

Prime Minister Narendra Modi lenisüba kübok Centre-i North East aser talisa Nagaland

renlok daksütsü tenangzükba lir ta Suresh Gopi-i ashi.

"Ketdangsürtemi budget jungjunga asadangtsüla aser India nung senso ka ama Nagaland nung kija shia atema tajangzük bentsür arutsü merangtsüla. Ketdangsürtem sentong atongtsüla aser ibaji tongteta inyaksüla, nenoki ashiba mesüra bener aruba mapatong ajak pusema nungittsü" ta Union Minister of State-isa ashi.

Iba senden amenba sülen MoS Suresh Gopi-i Naga Heirloom Centre, Sovima semdang aser Chief Minister Rio'er kidangi ao.

Iba mapang Commissioner & Secretary & A&C Himato Zhimomi, Additional Director T. Kakiho Sumi, Secretary Tourism Nchumbemo Lotha, Chumoukedima Administration aser department ketdangsürtem pa meina senzü.

Mokokchungnung District Level Watershed Yatra tenzükogo



Yimchalu Village Community Hall, Mokokchung nung District Level Watershed Yatra agidang tangokba noksa ka nung Deputy Commissioner, Mokokchung, Thsüvisie Phoji aser ketdangsürtem angur.

Dimapur, Tsüklai/February 14 (TYO): Department of Land Resources (LDR), Government of Nagaland ajanga Yimchalu Village Community Hall, Mokokchung nung District-Level Watershed Yatra sentong ayongzükba February 14, 2025 nü tenzükogo.

Iba sentong ya watershed development aser ali wazüka ayuba maparen nung awareness agütsütsü aser nüburtem nem shilem agidaksütsü nükjdong nung ayongzükba lir.

Yimchalu Village Council chairman C. Wati Walling-i pela agizükba o jembia sentong tenzük aser Sentinungla, District Project Officer (DPO), LRD ajanga tayongzükba o jembidang iba campaign ya February 5 nü Kohima nung tenzük aser February 13, 2025 nü Mokokchung atong, ta ashi.

Iba Yatra ya temeshi aini aoba amai lir, koba ajanga ali aser tzü wazüka ayuba nung shilem agütsü ajungmesotsü aser awareness agütsütsü nükjdong nung lir, ta lai ashi.

Tzü agi anüngba ajanga tesem ka nungi kati aoba nungi kumzükba alitsü kanga

tongtipang lir ta lai ashi aser nüburtem dang ali nung tzü lidaksütsü aser ali nung temu lidaksütsü asoshi mera balala agütsü ayongzükba liasü.

Sentong nung Deputy Commissioner, Mokokchung, Thsüvisie Phoji-i Land and Water Conservation Pledge ketdangsüa agi.

Yimdak yimtsüng nung alir shilem 50 dang tajembai alu ayimer aser timbai süngdong-lidong atemba nung temulung agütsür, ta Mokokchung DC ajanga ashi.

Iba temelenshi ya terenlok asü takoksa asütsü, ta pai asüngdanga liasü.

Nagaland nung tzü-mopung ajungba aser Yimchalu nung tzü peria aliba ya sustainable development nung amshitsüla, ta pai ashi.

State nung Mokokchung aser danga headquarters nung tzü agi anüngba tebilemtsü lemsatepdang, tzü kumzükba ayutsü asoshi ajaki inyaksü nüngdaker ta Deputy Commissioner Thsüvisie Phoji-i ashi.

Yimchalu Village ajanga tasü tait mapa inyakba atema pai tenüngsang agütsü aser anasa

aliba yimtsüngtem aser state asoshi yakbang nung nokdaker akumtsü ayongzükba liasü.

Iba sentong nung Musuc & Drama Committee, Eden Academy, Mokokchung ajanga saya tatsüka agi shilem agia liasü aser Ruokuosietuo Dzüvichu, DSCO, Mokokchung, aser B. Imti Tzudir, District Agriculture Officer, Mokokchung nati shisa lemsatepba mapang aser Watershed Ki Paatshala agia liasü.

Yimchalu Students Cultural Troupe ajanga sentong nung sobaliba tsüngsang ka agi shilem agi.

Iba Yatra nungya tetoktepbba aser exhibition balala "Save Trees, Save Earth" nung ajemdaker agir, quiz competition aser SHG products tem sayur aser ayoker.

Ano Yimchalu Watershed Committee ajanga coffee plantation site nung Coffee Bush Management nung rangloker Shramdaan ayongzükba agir.

Tatem nung DPO, LRD, Mokokchung ajanga Watershed Structure aser Water Reservoir Tank agüja liasü.

Kigwema lushi nung morok mi tesashi adoka lir

Kohima, Tsüklai/February 14 (TYO): Kohima district nung Kigwema Village kübok Japfu Christian College temalen Kipfüzha sector nung nisung aliba tekalen morok mi tuluka jangruteta nüburtem shisabulu nung lir.

Iba morok mi ya Hokulbar anüngdang 11:30 ako meta tenzük ta ashir aser tuluba kuma Mt. Shüho/Shüho Peak leni kanga kera jangrua aor, kong red rhododendron aser orchid ama naro asüyonga tesem aika nung manguba yangji angur.

Süngdong-lidong aser yangji aliba arem shiruru aser nisung asoshi iba morok mi yagi lendong tulu bener arutsü, aser iba mi ya tsünglangleni jangruyonga alua nisung alidak kongshiba den libajen kanga akoksatsü akok, ta

Kigwema Village Council chairman Balie Kere-i ashi.

Fire and Emergency Services, Kohima (South) Station nungi Officer In-charge Kelesa-i ashiba agi, morok mi adoka aliba osang parnok dangi anüngdang teroto meta aru aser fire tender ka den personnel trok arsanga oa liasü.

Ajisüaka fire tenders otetba tashinung mi ya aziüktet saka mi ya tenem leni kaoloka aoba yong parnok moteti meyipa shilang, ta pai ashi.

Yimtsüng nungi volunteers tem aser Southern Angami Youth Organisation saksalema mapang shia tensa asadanga osang agütsür, ta ashi.

Iba osang züluba mapang tashinung mi tenzükba kuli memeteti liasü.



Dimapur Ao Youth Organisation (DAYO) indang Economic Resurgence Committee aser NRC (Pig), Rani, Guwahati den ICAR, Jharnapani, Medziphema ajanga February 7, 2025 nü tetsür ana nem pilot project atema ak chanu ana-na (2 piglet each) angati agütsüogo. Dimapur lenden nung alir asen Aortem an aser ak mesüba aser anepaluba tangazükba agüja iba Committee ajanga inyaka arudar aser tang tashi angati ak aser an chanu lema agütsür. Dr Michael Imchen lenisüba nung Committee ajanga maneni Aor kiset shiruru anepalu aser achayangba nung tajangzük alua kibongtem ajungkettsü nükjdong lir.

Niuland DPDB senden nung terenlok mapatem reprangtep

Dimapur, Tsüklai/February 14 (TYO): Niuland District Planning & Development Board (DPDB) senden February 14, 2025 nü Minister, PHED and Co-operation aser Chairman, Niuland DPDB, Jacob Zhimomi lenisüba kübok Deputy Commissioner, Niuland indang Conference Hall nung mena liasü.

Iba senden nung taoba DPDB senden nung lemtetba tem lepa reprangshia liasü aser Department of Land Resources atema office yanglutsü atema

jembi.

Kuhuboto Town nung Multipurpose Indoor Hall ka yanglutsü, S. Vihuto village nung INNOLI Society registration agütsü aser Niuland Pulse ta sür district nung aluyimba maparen, aonsütsü aser süngjang-lijang adokba tejangja magazine ka adoktsü temelaba agüja liasü.

Minister Jacob Zhimomi-i Niuland Local Ground tuluba akumtsü asoshi kanga junga asameyangtsü ayongzük aser iba mapa District Sports

Officer nem nungloktsü aser taruba senden nung osang agütsütsü.

Inner Line Permit shidak amshitsü tongtipang ta angatetdakja Chairman-i district ketdangsür ajunga dang amalitep akatsü ayongzük.

Department of Food and Civil Supplies ajanga district nung tang teinyakdak mapatem indang osang agütsü aser taruba DPDB senden nung Department of Power ajanga par inyakyim osang agütsütsü nungloktsü.

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA NOTIFICATION

Dated Kohima, the 13th Feb 2025

NO.ED/PLN/E-19/22-23 :: All concerned are hereby informed that the application formats for recognition, renewal of recognition and up-gradation of permitted Private Schools (Primary and Upper Primary) and recognition format for permitted Pre-Schools have been uploaded on the Department's Website <https://education.nagaland.gov.in>. The formats shall be available from the date of issue of this notification till 15th March 2025.

Therefore, any School wanting to apply can download the required format and submit the same to the Department within the stipulated time.

(THAVASEELAN K) IAS
PRINCIPAL DIRECTOR



Office of the
AO RIJU
MOKOKCHUNG : NAGALAND - 798601
"Kenozülu Yinsem"

Ref.No. AR/SD/2024/15

Date: 14-02-2025

SANGDONG

Aenjeti 22-24, 2025 anogotem nung Ao Riju-i achaayanga agiba Arangtet Tatidang nung takok angurtem yamai sangdonger:

ACT 201-202: Tatidang agütsür: 1 Takok angur: 1
3rd Division: Roll No.2

ACT 401-402: Tatidang agütsür: 1 Takok angur: 1
2nd Division: Roll No. 1

ACT 501-502: Tatidang agütsür: 2 Takok angur: 2
1st Division: Roll No. 1* & 3

ADT 101-103 : Tatidang agütsür: 8 Takok angur: 2
1st Division: Roll No. 4

2nd Division: Roll No. 6
ADT 301-303: Tatidang agütsür: 9 Takok angur: 9

1st Division: Roll No. 1*, 2, 3, 6, 7, 8 & 11
2nd Division: Roll No. 4 & 9

PGDT 601-603: Tatidang agütsür: 11 Takok angur: 11

1st Division: Roll No. 1**, 2**, 5, 6, 7***, 10*, 12, 15**, 16** & 17*
2nd Division: Roll No. 13

Temetettsü:

1. PGDT 701-703 nung tatidang agütsür alir item Roll No.tem iba takoker osang sangdongba anogo nungi ita ka tsüngda tashi nung Dissertation onük (Soft copy nung) office tongtsütsüla. Roll No. 1, 2, 3, 4, 5, 6, 7, 8, 9, 10, 11, 12, 13 & 14

2. Roll No. sülen * aliba tetezü marks 80 sür tema anguba tamaittsü alitsü.

3. Takok ngua alirtem atema Marksheet Tsüklai 25, 2025 anogo office nungi angutsü.

Sd/

Rev. Prof. Rongsen Lkr
Chairman

(S.Wati Ozüküm)
Secretary

Feb 17 nü India aser B'desh nati arrtsü ken o jembitsü

New Delhi, Tsüklai/February 14 (Agencies): February 17 aser February 20 anogotem nung India aser Bangladesh nati arrtsü ken o balala jembitsü; talisa arrtsülen atsü atsüba aser Bangladesh nung ozüing alema inyakertemi BSF sepaitem aser civilians amakba indang jembitsü, ta ketdangsertem osang ka ajanga metetdaksü.

BSF aser Border Guard Bangladesh (BGB) tsüingda 55buba Director General-Level Border Coordination Conference ji February 17 nungi Delhi nung aliba Border Security Force (BSF) headquarters nung ayongzükogo.

Yaküm August ita nung Bangladesh nung Sheikh Hasina-i aniba sorkar atsüingdokba sülen tang mezüing linük ana tsüingda ayongzükba senden nungji India tsütsülen nungi BSF Director General Daljit Singh Chawdhary leniba nung tongti ketdangsertem adentsü aser Bangladesh nungi Major General Mohammad Ashrafuzzaman Siddiqui leniba nung BGB tongti ketdangsertem shilem agia adentsü.

Arrtsülen linük anaprongla nungi sepaitem tsüingda amalitepa inyaktsü aser security dak sendakba

tongtibang onüktem nung o lemtepa asalentong yanglutsü atema iba senden ayongzükter, ta Hokolbarnü BSF sangdong ka ajanga metetdaksü.

Iba senden nungji Bangladesh nung ozüing alema inyakertemi BSF sepaitem aser India nung civilian amakba, arrtsülen ozüing alema inyakba mapatem nokdangtsü, 'single-row' atsü atsütsü, Bangladesh telung nung India nung telungpur teloktem anema inyaktsü, arrtsülen infrastructure terenlok, Coordinated Border Management Plan aser linük ana tsüingda sepaitem temelung lemteptsü atema jembitsü.

Yaküm March ita nung Bangladesh yimtiba, Dhaka nung linük anaprongla nungi sepaitem kasa senden mena liasü.

India-Bangladesh arrtsüji kilometer 4,096 talang lir aser arrtsü jagi India kübok state pongu amshir: West Bengal nung kilometer 2,217, Tripura nung kilometer 856, Meghalaya nung kilometer 443, Assam nung kilometer 262 aser Mizoram nung kilometer 318 Bangladesh den arrtsüa lir. Bangladesh den arrtsülen security aser intelligence atema BSF sepaitem nem mapa lemozükja lir.



Washington D.C., February 15, 2025: White House nung Ato kilonser Narendra Modi aser US Tir Donald Trump na senden amendang tangokba noksa nung angur.

Modi-i India nung US Universities campus lapoktsü ajungshi

New Delhi, February 14 (Agencies): India aser US nati linük ana tsüingda higher education institutions amalitepa inyaktsü, linük ka nungi kati kaketshirtem oa shisaliok bushitsü aser India nung America nung college campus lapoktsü atema jembio.

Brihostibarnü White House nung Ato kilonser Narendra Modi aser US Tir Donald Trump na senden amenba mapang nung tenati kaketshirtem, research agirtem aser mapa inyakertem linük ana nung sadamsadema senzütsüji tongtibang, aser iba ya ajanga linük anaprongla tajangzük angur, ta bangjemogo.

Open Doors Report ajanga ashiba agi, 2023-24 kümsük

nung US nung azünger India nung kaketshirtem 3,31,602 liasü, aser ibaji 2022-23 kümsük den medemdangra shilem 23 agi teimba akümba lir. 2022-23 kümsük nung US universities aser shisaliok reju balala nung azünger India nung kaketshir 2,68,923 liasü.

Linük anati külem sangdong ka ajanga, "Tir Trump aser Ato kilonser Modi nati linük ana tsüingda nüburtem tesendaktepji kanga tongtibang ta bangjemogo. India nung kaketshir 300,000 dak tali ajanga küm shia US nung rongsenkettzüing nung dollar sen billion 8 bendenloker aser ibaji ajanga mapa aika adokdaksür," ta metetdaksü.

Kasa sangdong ajangasa, "Linük anati külemi Centres of

Excellence amenoktsü aser US nung nüngtugu shisaliok rejutem indang campus India nung lapoktsü atema jembio," ta sangdong nung shia lir.

Trump aser Modi nati osangbenertem den jembidang Modi-i, "Asen linük ana tsüingda tesendaktep yangerba nung America nung alir India nungertemji kanga tongtibang. Asen linük ana tsüingda nüburtem tesendaktep tajungba akümsü atema kobi meli onoki Los Angeles aser Boston nung Indian consulates lapoktsü," ta metetdaksü.

Modi-isa, "Onoki American universities aser educational institutions dang India nung offshore campus lapoktsü ajungshir," ta metetdaksü.

UCC kübok nüburtemi mepishiba ken o HC-i angadangtsü

New Delhi, February 14 (Agencies): Uttarakhand nung Uniform Civil Code (UCC) ozüing ajanga kongshiba nüburtemi benokba temepishiba ken otem Uttarakhand High Court(HC)-i agizüiktsü, ta osang ka ajanga metetdaksü.

Sorkar ketdangsertemi UCC ozüing kübok aibelenertem anema inyaktsü, ajisüaka aibelenertemi court nem temepishiba ken o agütsütettsü atema Uttarakhand High

Court-i tanü (Hokolbar) nüburtem nem temelaba agütsüogo.

India nung UCC ozüing mezüing benokba state ji Uttarakhand lir.

Uttarakhand state nung UCC benokba anema temepishiba ken o kar agüja liasü; Hokolbarnü item ken o angadanga mapang nung High Court-i UCC dak sendakba nung takoksa angurtemi mepishiba ken otem parnoki

angadangtsü, ta metetdaksü.

High Court Division bench-i, "Iba ozüing ajanga kar kongshira parnoki iba bench nem temepishiba agütsütsü akok, nenok anema inyakra onok dangi arung," ta metetdaksü.

Temepishiba ken o agütsürtem tenüing nung jembitsür advocate, Kapil Sibal dang Chief Justice G Narendar-i, UCC kübok temerenshi angurtemi court matsüingdang ken o agütsütsü akok aser court-i ken otemji angadangtsü, ta ashi.

Tamalen Uttarakhand High Court-i Uttarakhand state sorkar dang, UCC ozüing anema ken otem benoka lir, anungji iba dak sendakba nung telangzüba agüjang, ta tuyua lir.

Uttarakhand sorkaria, UCC ozüing tim mesüi amshia tiyazü nung ken o magütsütsüla, ta tekümdangtsü metetdakja lir. Iba ozüing kübok tiyazü nung police nem ken o agütsüra parnok dang senchi achitsü, ta sorkari metetdaksüogo.

UCC ozüing kübok tiyazü nung ken o agütsürtemi mezüing aibelenba sülen tekümdangtsü metetdaksütsü; tanaben aibelenra senchi 5000 achitsü aser tasemben aibelenra senchi 10,000 achitsü.



February 14, 2025 nü Hyderabad nung Bajrang Dal Telangana züngsemtemi 'Valentine's Day' nokdangtsü takhangba agütsüba den külemi 2019 küm Pulwama nung kiralongrartemi amakdang asüba sepaitem bilemteta 'Veer Jawan Day' ajungketjang ta takhangba agütsüdang tangokba noksa nung angur.

Form No. 3

[See Regulation-15 (1)(a)] / 16(3)

DEBTS RECOVERY TRIBUNAL GUWAHATI

Suvarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 354 / 2024

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No. 4527

BANK OF BARODA

-VS-

M/S. K NAGI STONE CRUSHER UNIT & Anr.

To,

(1) M/S. K NAGI STONE CRUSHER UNIT

A Proprietorship Firm Represented by Mr. Khrielesie Nagi, Office at H No. 130, Jotsoma Village, Opposite Primary School Jotsoma, Kohima- 797002

(2) MR. KHRIELESIE NAGI

Son of Mr. Kesolie Nagi, H No. 130, Jotsoma Village, Opposite Primary School Jotsoma, Kohima- 797002.

JAOKER

20.01.2025 anogo nung Hon'ble Presiding Officer/Registrar matsüingdang OA/ 354/2024 benoka liasü.

Sentsüh Rs. 47,60,147.77/- alangzüktsü atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir).

Iba Act nung section 19 kübok sub-section (4) nung ajemdaker na aser defendants dang teküboklen metetdakja alibatem tuyur :-

(i) Iba case defend asürtemi tajaba agütsüba sülen anogo semer nü tsüingda relief asoshi mepishibaji kechiba magütsütsüla, iba kuliji sayutsü metetdaksür;

(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;

(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;

(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;

(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.

Nü dang tezüluba nung sangdong applicant nem agütsütsü tuyur aser 25.02.2025 anogo nung anepdang 10:30 ako nung Registrar matsüingdangi arutsü tuyur, yamaji meinyakra application ji angadangtsü aser na meliaka telemtetba agütsü.

21.01.2025 anogo nung tsüinglanglen kü meyongnem den iba Tribunal indang seal agütsür:

Registrar,

Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR KÜPTOKNÜ, FEBRUARY (TSÜKLAI) 15, 2025

Trump-i rara anendaktsür asü?

US tir Donald Trump ya kanga tesashi aser o soita mayu indangindanga jembiba nisung ka lir. Aji oda, mejungli asü nungbo pa ya lendong nisung lir aser jungdi asünunga tajung tuluka inyaktettsüba tasü tait aser temulung tulu yimten lenir ka lir, anungji pa ya alima nung rara adokdaksür ka mesüra yimjung yanglur ka asütsü. Pa US tir kümer anogo ishika tsüngda alima nung temelenshi aika atalokdagi aser item tatalokbatem rongnung tongtibang kaji Israel aser Hamas na tsüngda rara anendaktsür, pei pei lima nung tepuokdak puoka alirtem melentepa chioktsü asoshi yimjung yanglutetba mapa ya ka asütsü. Atangji, Hamas aser Israel na tsüngda yimjung yangluba ya Donald Trump US nung tanabenbuba tir mendeni atutsü anogo ka lia atalok, kechiyong Donald Trump-i pa US tir aküm tashi nung Israel aser Hamas na tsüngda raraba ya maneni lira, Hamas purtem asoshi lendong asütsü ta metetdakja liasü. Ashiko, aji tsübuba agi Hamas teloki Israel nungertem den yimjung yanglu asütsü akok. Aji oda, ano tanga Hamas teloki tanüngba Israel nungertem mechioki alitsü ta sangdongba osang angashia, Donald Trump-i Israel nunger Hamas ket nung tanüngba puoka alirtem tan Küptoknü (Honibar) anüngdak anjungmeshi tashi nung mechiokra lendong tulu ajurutsü ta amokmerena metetdaksüba sülen, Hamsa teloki tanüngba Israel nunger puoka alirtemji nangzüktepba ama chioktsü ta sangdongogo. Atangji, Trump US tir makümdangyongi Israel o Hamas ra rara nung, Israel nungertemi Hamas teloki yimsü süa aliba tesem Gaza-bo ajak makdoker liasü. Ajisüaka, Hamas telok ya Palestine nunger parnok yimten nüchiso bushirtem asünungji kanga tara, mashi nungbo teka memetonger. Aji oda, parnok yimsü süa aliba Gaza ajak makdoker külena parnok tongti arürkhutongtem ka khen, ka khen ta Israel nungertemi khasetaka, Hamas teloki Israel nungertem den yimjung yanglutsü maritep. Idangjia, Joe Biden leniba nung US-i Israel nungertem yaria liasü, ajisüaka Hamas teloki tang Trump tsübuba amai Biden-bo metsübu. Atangji, Israel aser Hamas na tsüngda tang yimjung yanglua aliba ya khen atema dang lir. Tang tashi nung tena tsüngda yimjung yanglur anogo 26 tsüngda Israel nungertemi parnok ket nung puoka aliba Palestine nunger 730 Hamas telok nem agütsüogo aser item melena Hamas telok ket nung pua aliba Israel nunger 21 chiokogo aser ano parnok nangzüktepba apibo ano Israel nunger 12 chioktsü anünga lir. Aji oda, Hamas aser Israel nunger na tsüngda January 19 nü yimjung tenangzüktepba ken o nung Hamas teloki Israel nunger 33 chioktsü aser Israel nungertemi Palestine nunger 2000 shi chioktsü terenemba lir. Item puoka alirtem ajak chiokba sülenang shitakba parnok tsüngda yimjung maneni alitsü asü, ano rara tenzüksüar ajibo shingai meshitettsü. Ajisüaka, item tensa tia ajakji Tsüngrem o Donald Trump na ket nung dang lir. Aji oda, Israel aser Hamas na tsüngda dang masü saka Russia aser Ukraine na tsüngdaa rara anendaktsütsü asoshi Trump-i mapa tenzükogo. Ajisüaka, pai taoba US tir Biden mapang US-i Russia-Ukraine rara nung shilem agiba ama masü saka kenyongi inyakyim balaka nung Urkaine den masü saka Russia den-ang tongtepratep tenzükogo. Ukraine tir Zelensky-i tashi tulu aketba lima, Russia ama den kasasa rarartetba tashi ya, atangji, tanga European limatem nungia angur saka teyari tulubajibo US nungi angur. Ajisüaka, tang Zelensky denbo kecha mejembi ser Russia tir Putin denang ghonda ka ser ta jembiba jagi yimjungji Zelensky atsünga masü saka Putin tsütsü tejak talangba shija yanglutsüner amai reprangteter. Trump-isa tawaka, Ukraine ya tarutsü nungbo Russia akümtsü ta jembiba angashiogo. Iba jagi Trump-i Zelensky tsütsü atsünga tulukabo meinyaktsütsü ta angateter. Atangji, Trump ya tashi tulu, anungji pai World Health Organisation nungi dang masü saka United Nations Organization nungia US medeni onür. Ajibo majung, kechiyong alima telongjem nung medenra, US dak tashi tuluka alitsü akok, saka alima lenir masütsü, anungji lensüba magütsütettsü. Aji oda, US külen, alima külen ta masü saka US-i alima anitsüla ta Trump-i angatet tajungba asütsü.

OLEMSABANG

MOLUNGKIMONG LITERATURE BOARD DEN KÜ TEBILEMBA OREN KAR LEMSATEPER

~ K. Tia Longkumer Principal,
Haven Of Hope Seminary. Dimapur.

(Yashi adok nungi...)

Kechiyong Noel Williamson-i tai makaba Molungyimsen nübür merenshibayong Molungyimsen-tsür tantsür kati SDO-baji metzü metsülokja atakatemer yokba sülen Arunachal nung Abor aser Misemi nungeri 1911 March 29 nü ar mena atar Noel Williamson den sepai ishika dena pua aru aser kanga rishikangshir tepset. Dr. Clark Milak apu ajanga senzüdang paibo pa korji Milak ayong nung kortzüten ta ajaba tesem ajanga yokerang pa apu ajanga senzüba otsü lir.

B. Ano “British Occupation of Ao Naga Country” Tajenyuba Ao, kaket nungbo yamai zülua lir, **“But on April 4 (Sunday) 1886, 8 men from Dekahaimong who went for trade in the plains were attacked by a party of Noagaon men near Amguri... The same night the Noagaon men raided Dekahaimong, killed five men and burnt down the village completely; its inhabitants were dispersed and took shelter at Molung and when the inhabitants tried to rebuild the village it was again destroyed by Noagaon men who also had threatened Molung for sheltering the refugees of Dekahaimong. Rev. Rivenburg who was taking charge of Molung in absence of Dr. Clark urgently sent messengers with tragic news to Sibsagar and to the Sub-divisional Officer at Wokha.”** Dr. Clark record nung shia aliba agia pa 1885 nung America-i aodang Rev. Rivenburg nem Mission mapa charge agütsür ao ta zülua lir, aser 1886 küm tepiyong America nung aliba indang shia angutsü, anungji 1886 nungji Dr.Clark-i shiti Wokha nung aliba British Officer dang jagi zülua lir ta asübaji Rev. Rivenburgi züluba lir, kechiyong Clark America nungang liasü ta angateter.

C. Ano Rev.Dr. E.W. Clark jajadang o meyiper anir aoba aser maobaji yamai lir. ‘A Corner in India’ nung Mary Mead-i züluba nungjibo Wameken yimdak Yisu taküm otsü Edijungbai ashidang par nüburi ano Yisu otsüji khen shiang ta ashiba indang angutsü. anungji o meyiper anir jaja ta angateter kechiyong Dr. Clark-i masü Edijungbaiang Yisu otsü ashiba kaket nungji zülusem. 1885 küm tetenzüklen Dr.Clark-i Molungyimsen yimsüsür kar anir Aolima yimtsüngtem nung tetsüng ajemoka jajaba indang pai report agütsüba nung shia lir. Iba den külemi McCabe D.C. Kohima-ia Rev. Clark den Molungyimsen yimsüsür kar dener Longkhüm yimdak January tetenzüklen pa den atua ajurutepba indang pa tour diary nung züluba jangjajangjaa shia angutsü. Asenoki metettsübaji Molungyimsen nung Mission Centre amenoka alidang yim kwika nung arogo tenzuka ao, item Arogo otsü kaket nungji reprangdangra Dr. Clark den Molungyimsen nunger densema aruba indang zülua angutsü. Anungji otsüi ashiba aser record nung aliba ajanga Clark-ji pa kisüng jaja masü saka pa den o meyiper dener Tsüngrem osangtajungji proka jajaba indang angutsü.

Jashiseta alidang kecha telemtetba magitsüla aser pelaseta alidang kecha menangzüksüla ta shin o lir. Anungji tanü aibelena züluba jagi tarutsü nung nübür tsükdaka lia lir ta tarutsü indang bilemdanga shisadangerang keno jembishinüa zülü tajungba ta shidanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

June 8 nü 'Baptize America' sentong nung nisung aika baptitsü



Yaküm Huntington Beach nung 'Baptize California' sentong agidang tangokba noksa nung angur.

February 14, 2025: June 8, 2025 nü 'Baptize America' ta ser sentong ka agitsü, aser iba sentongji America nung kenüyongi nisung teimtiba tzü nung baptiba anogo asütsü imlar. California kübok San Juan Capistrano nung aliba Oceans Church nung pastor, Mark Francey-i Baptize America sentong agitsü atema renemdar. Tamalen America nung Baptize SoCal aser Baptize California sentong na agia liasü. 2023 küm Baptize SoCal sentong nungji nisung 4,200 bapti aser yaküm Baptize California sentong nung nisung 12,200 baptia liasü. Taküm Baptize America

sentong nungjibo ano iba dang nungjagi nisung teimtibai baptitsü imlar, ta pastor-i metetdaksü. Francey-i, "Onoki linük tesem ajaklen movement ka tenzüksü. Tsüngremi yangi California nung mapa inyaktetra Pai Tennessee mesüra Florida nunga inyaktettsü aser tanga state tem nunga mapa tulu inyaktettsü," ta metetdaksü. "Onoki renemshidar. Baptiba sentongtem nung Tsüngremi ano mapani mapa tulu inyaksü ta amanga onoki kanga yongyar," ta pai metetdaksü. Laishiba nung shia aliba Tsüngrem O amangertem ajaki melungsoa baptitsü atema Francey-i

denominations kecha tebandang makai Khristantem ajak longjemtsü asoshi inyaker. "Asenok ajak obang ka asübjai baptiba ya lir. Iba atema Arogo ajaki longjemer inyaktsüla," ta pastor-isa metetdaksü. US tesem ajaklen college/universities campus tem nung asentenshi milak janrua kaketshir aikati Khrista agizüka baptiba mapang ka nung Baptize America sentong ya agitsü. 2023 küm February ita nung Asbury University, Wilmore nung asentenshi milak jangruba sülen iba milakji universities campus aika nung prokshio.

Asbury University nung tekülem sentong ka tenzük saka iba sentongji metembangteti hopta ana tashi maneni agiba sülen iba osangji alima tesem ajaklen prokshia liasü. Baptize America sentong atema America tesem ajaklen Arogotem longjemer June 8 nü baptiba sentong agitsü ayongzüker. Iba atemaji temelungertemi Baptize America website nung register asütsü akok. Pastor Francey-i, "Khenyongi lokti tulu baptiba sentongtem takok anguba ajanga ni kanga süngmanger. Iba ama sentong ayongzüka agitsü atema Tsüngremi ni jatet südi, ta ni amanger," ta metetdaksü. Pai mezüng Baptize SoCal ayongzüka liasü aser iba sentongji takok anguba sülen pai state level nung Baptize California sentong ayongzüka agi. Tang tesüsa pai linük level nung Baptize America sentong ayongzüker. "Onok ya tazüngla nisungtem lir saka Tsüngremi ajak inyakteter. Onoki Tsüngrem den partnership yanglutsü merang aser Pai mapa tulu inyakogo," ta pai ashi. America nung Jesus Movement tenzüker küm 50 ajungba anogomong nung 2023 küm Baptize SoCal sentong ayongzüka California tzyüymkümlen Pirates Cove nung nisung 4,000 dak temai Yisu Khrista agizüka baptia liasü.

1960s aser 1970s nung The Jesus Movement mapang Pirate's Cove ya baptiba tesem liasü. Iba tesem ya The Jesus Revolution film nunga lir. 'Jesus Revolution' film ya 2023 küm February ita nung theaters nung saya. Jesus Revolution film ya America nunger puti otsü nung revival tulutiba adokba otsü nung ajemdaker yanglu. "Jesus Revolution" film otsü nung, 1970s mapang pastor Greg Laurie den lanur kari West Coast nung ochi aser taküm nung chichiba tetezü bushi tenzüker. Iba mapang nungji Greg Laurie-i lanur sayutsüngir, Lonnie Frisbee ajurur. Sayutsüngir jagi pa den Yisu Khrista osangtajung lemsateper aser lanurtem dang Tenla kidangi arutsü ajungshir. Oceans Church-i ayongzüka 'Baptize SoCal' sentong nungji nisung 8,000 shi aden aser nisung 4,166 tzü nung baptia liasü. Baptize SoCal takok ngua agitetba sülen yaküm May 18-19 anogotem nung Baptize California sentong agi, aser iba sentong nungji nisung 12,000 dak tali baptia liasü. Ibaji US putiotsü nung nisung teimtiba baptiba sentong liasü. 'Baptize California' tongti sentongji Huntington Beach nung agi aser yangji nisung 6,000 shi bapti aser California state tesem ajaklen tanga Arogotemia iba sentong nung shilem agia nisung 6,000 dak tali baptija liasü.

ADF-i Nicaragua nung pastor tem chioktsü atema teyari meshir



Puerta de la Montaña ministry nung pastor tem aser lenirtem

February 14, 2025: Nicaragua linük nung Khrista osangtajung lemsatepba atema sorkar ketdangsertemi pastor tem aser ministry lenir 11 jail nung puoka lir. Iba linük nung pastor tem jagi US nung amenoka aliba ministry Mountain Gateway den senteper Nicaragua nung sentong aika ayongzüka agia liasü. Jail nung aliba lenirtemji chioktsü atema Alliance Defending Freedom (ADF)-i court dang teyari meshir. Mountain Gateway Order tentetsang, Britt Hancock-i, "2023 küm Mountain Gateway-i evangelism sentong aika ayongzüka nung yaritepa liasü. Iba küm piyong nungji sentong 8 agia liasü. Onoki February ita nung tenzüker aser tesüsabuba sentongji November ita nung agia liasü. Item sentong 8 nungji ajak senteper nisung 1,000,000 shi aden," ta metetdaksü. Mountain Gateway ministry

den sendaktepa aliba Nicaraguan branch dang 'Puerta de la Montaña' ta ajar. Iba linük nung evangelistic sentong tatembangbuba agiba sülen mapang tatsüka tsüngda sorkar ketdangsertemi 'Puerta de la Montaña' nung pastor tem aser lenirtem pua liasü. Nicaragua nunger pastor temji jail nung puokba sülen ita 8 jungogo. Yaküm March ita nung pastor temji küm 12 nungi küm 15 tashi tepuokdak ayutsü obendang agütsü aser nisung shia dang senchi dollar sen million 80 agüjang, ta tuyua liasü. Ita ka shi lir Alliance Defending Freedom (ADF)-i Inter-American Commission on Human Rights dang pastor temji tiyazü nung aitsüogo, ta metetdakja liasü. "Pai tamangba yimsü atema shinga tepuokdak mayütsüla mesüra temerenshi magütsütsüla. Ajisiüka item Khristan lenirtem dak iba ya atalokogo. Nicaragua nung ketdangsertemi meimchir temeden

wazüka ayutsü aser pastor tem chioktsü imlar," ta ADF-i metetdakja liasü. Iba sülen Inter-American Commission on Human Rights-i Nicaragua nung ketdangsertem dang Puerta de la Montaña lenirtem chioktsü aser parnok temeden akhümtsübsü metetdaksü. Tang ADF-i Inter-American Court of Human Rights dang Nicaragua nung meimchir temeden anema inyakba atema iba linük aijang aser tamalen court tetuyuba tashi mangaba atema sorkar anema inyakang, ta mepishir. ADF International legal counsel, Kristina Hjelkrem-i, "Mezüngyongi item Khristan lenirtem tim masüba nung jail nung mepuoktsüla liasü mesüra Nicaragua nungi memeindoktsüla. Iba linük nung tensa mejungi lir. Nicaragua nung sorkar yimsüsüba kübok timtemertem atema onoki maneni ochi temeden bushitsütsü," ta metetdaksü.

ANOGO ABEN TSÜNGREM DEN

TANELA SÜNGJANG: TABENSA SOBUTSÜ

"Saka Tanela tejang itemi: temeim, tepela tesünep, taremzüker, kümli tajung, tejungnü, temulung lemtetba, ajemaluba, pei sasa azüokba. Item anema tanga ozüng kecha mali." ~ **Galtia 5:22-23**

Khristan Yimsü amanger ajungai Khristan taküm kaji anogoshi Tsüngrem tanela agi sünga alitsü indang jembir. Talisa kodang Arogo nung tenzüksü asoshi nübu bushirdir Arogopuri mezüng tarensen nung aginübjai tanela agi sünga aliba nübu. Tanela agi sünga aliba tetezü tanela taküm, mapa ajak nung tagizüktettsü küma aliba.

Tsüngremer tanela temeshi agi sünga aliba taküm kaji tanela süngjang agi sünga maparen ajak nung sayutetba takümji lir. Tanela süngjangtemji asen taküm nung sobutsü kümdakja anogoshi jaja nung dang asenoki Khristai aginüba taküm kaji litetsü.

Tanela süngjang shitak tanga aliba amangbapurtem asenok asütsü tepang kisüng agi jembiba masü, saka tanela süngjangji asen taküm sobutsü kümdaktsür mapa agi liteta sayutetba amangbapurtem asenok asütsü merangdi. Amen

AO OSHI ANGAZÜKDAK:**TANÜ ANGAZÜKTSÜBA OJANG****Tejangko**

(adj) süsünemnem, memedem (negativism, unseemly)

* Tejangko jakla adeneri chi tejangko soruteter.

Tejangraba

(adj) inyaknuba (interest, enthusiasm)

* Tejangraba maliba mapa nung mapang meindoktsüla.



Tir Yimyim

OLONG PAITEP # 7064

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajok

-

(5)

-

(4)

-

(6)

-

(4)

-

(7)

-

(4)

-

(6)

-

(4)

-

(5)

LANGTSÜNGLEN

- Hai sür inyak
- Aor tenüing ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

-

(4)

-

(6)

-

(5)

-

(4)

-

(5)

-

(5)

-

(6)

-

(5)

-

(4)

OLONG PAITEP # 7063 TELANGZÜBA**TIPIEN :**

- Aben, 4. Artsü, 7. Lisem, 8. Liwa,
- Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung, 11. Dokan, 13. Tinu.

NAI-A YA METETTER MA

Maharashtra nungi arishi küm 14 tain Aaryan Shukla-i küm ka tejakdang Guinness World Record ka yanglua liasü ibaji Italian TV series Lo Shu Dei Record nung mapang tatsütiba nung 50 five-digit numbers bendendetba liasü.

Shukla-i 25.19 seconds nung iba otsü yanglutet aser Guinness World Records-i pa Dubai-i jaokba sülen ano otsü tasen 6 yangluogo.

Guinness World Records-i Shukla dang "Human Calculator" ta ajar aser pai anogo nung ghonda 5 hnungi 6 tashi math practice asür.

Manipur assembly menua magiba atema Congress-i aitsü

Guwahati, February 14 (Agencies): Congress party-i Brehostibarnü sangdong ka ajanga, Indian Constitution Article 174 nung Assembly sessions ana tsüngda ita trok dak tema tawa malitsü ta shia lir, saka Manipur nung iba iyakyim nung aibelenogo aser iba ya asa-a Constitution anema jenjang agiba lir, ta shiogo.

Congress general secretary in charge of communications Jairam Ramesh-i, state nung constitutional machinery chirepba aitsüogo aser Manipur nung aliba nüburtem maneni timtemtepba lemsatepogo.

Paisa, Manipur nung mepetmesü tulu adoker liaka Ato Kilonser Narendra Modi-i tangtashi state semdanga mali, ta ashi. "PM

Modi ajak leni aoer saka Manipur-i maoer," ta Ramesh-i ashi.

Manipur Angh-i Assembly session February 10 nü tenzüksü ayongzüka liasü aser Congress-i benokba no-confidence motion ka sensak asemstü liasü, ta paisa metetdaksü.

Ajisüaka CM-i pa mapa tokttsüba sülen iba parliament session ya "null and void" ta sangdonga liasü, ta Ramesh-i ashi.

"Ita trok süiogo. Article 174 nung aibelenogo. Iba ya kecha masü saka asa-a Constitution anema jenjang agiba lir," ta pai ashi.

"Ajisüaka iba ya kecha taoksatsü mali, kechiyong 2023 küm August ita Supreme Court-ia state nung constitutional machinery ajak chirepba

reprangtetogo. Manipur nung aliba nüburtem maneni timtemtepda aser parnok PM-i semdangtsü atadar, shiba ajakleni aoner saka Manipur kijai maoer," ta Ramesh-i ashi.

Congress-i Mongolbarnü, Manipur Angh-i kechiba Manipur Assembly mayongzüki iba article anema inyaksangshir ta shiogo.

N Biren Singh-i chief minister mapa tokttsüba sülen anogo ishika lir pai iba olen ya lemsatepa liasü.

Congress-i ashiba agi, Singh-i kanga menor mapa tokttsür aser state nung aliba nüburtem Ato Kilonseri semdangba atadar.

2023 küm May ita kin o kin tsüngda mangatetep tenzüka sülen nisung 250 dak tema süogo aser nisung 60,000 dak tema pei talidak ki tokttsür jenshiogo.

LPG cylinder tim mesüi amshiba atema Digboi shishilembar ka apu

Digboi, February 14, 2025 (Agencies): Tinsukia kübok Digboi nung Assam Police-i LPG tim mesüi amshiba maparen ka putetogo.

AOD-administered Gopenari LPG Bottling Plant, Digboi nung General Manager-i benokba FIR nung ajemdaker Digboi police-i shishilembar Medini Moran (30) apu.

Tasa tamajung atongba, temulung lemtetba anema inyakba, ashikülakba aser auyaba ken o tem kübok Moran apu.

LPG cylinders tazüing 312 enokba nungi domestic 220 aser commercial cylinders 24 dang

gari nung angu ta police-i ashi.

"Transporter Medini Moran'er kima nung anena aliba truck加里 nung cylinder 68 maliasü" ta Digboi police nung Investigating Officer-i ashi.

"Onoki akokba tashi bushisüngdang südar aser Essential Commodities Act of 1955 kübok ken o benokogo" ta pai ashi.

LPG transport nung cylinders 68 maliasü aser AOD meyong oset kodaser sama onoki bushiteper, ta Inspector Dibya Jyoti Dutta-i ashi.

AOD LPG plant nung küm 10 tema mapa inyaka aruba private

security department-i shilem agiba nunga ashishiteper.

Plant tema nung shrink caps dena sealing materials angur aser özüng alema inyakteremi item ya amshia cylinders shibanger.

Plant indang entry aser exit points nung scanners enoka liaka security nisungtemi cylinder auyaba mazüokteter.

"Tai tonglokja alisang onok ket nung anogo asemnü ayutsü meshiogo. Iba ajanga bushisüngdang mapa tajungba inyaktettsü aser Upper Assam nung LPG cylinder smugglers ajunga makdoktsü" ta Inspector Dutta-i ashi.

Feb 17 nungi Assam budget session tenzüksü

Guwahati, February 14, 2025 (Agencies): February 17, 2025 nungi Assam Legislative Assembly indang budget session tenzüksü aser iba ya kanga dang tongtipang session ka lir ta Assam Assembly Deputy Speaker, Numal Momin-i ashi.

"Iba Assam ajanga Assam ajungalen kin o kin putepshitsü" ta pai ashi.

"February 17 nungi tenzüksü

session ya kanga tongtipang lir, iba budget ajanga February 17 nung alirtem ajak ka akümtsü. Assam ya nisung temeyoktep aliba state ka lir, kin aser tamangba yimsü balala külemi putepa alir. Tang parnok anasa assembly session agiba maongka angutsü" ta Momin-i ashi.

Iba session nung tongtipang bill aika benoktsü imlar.

February 13, 2025 nü

Housing and Urban Affairs Minister Jayanta Mallabaruah-i Online Building Permission System (OBPS) tenzüksüogo.

Guwahati nung sentong ka nung Assam kübok municipalities 32 aoshi OBPS tenzüksü.

OBPS ya senso dak rangloker tenzüksü service ka lir aser state sorkari renem ta Minister Mallabaruah-i ashi.

**GOVERNMENT OF NAGALAND****DIRECTORATE OF MINORITY AFFAIRS**

dirminaffairs-ngl@gov.in

ANNEXURE-A**GOVERNMENT OF NAGALAND****DIRECTORATE OF MINORITY AFFAIRS****NAGALAND:KOHIMA**

No.DMA/PMJVK-4/2023

Dated Kohima, the 10th February, 2025

NOTICE INVITING EXPRESSION OF INTEREST

The Director, Department of Minority Affairs, Government of Nagaland invites Expression of Interest (EOI) from qualified and experienced organizations/individuals to manage and operate a Residential School located at Niuland town, under Niuland district.

Scope of Work

The selected operator will be responsible for:

- Administration and management of the school.
- Providing quality education in alignment with the national curriculum & as per relevant provisions of the Right to Education Act, 2009.
- Ensuring the well-being and holistic development of residential students.
- Maintaining infrastructure, facilities, and compliance with relevant regulations.

Eligibility Criteria**Applicants must:**

- Have prior experience in managing educational institutions (preferably residential schools).
- Possess a team of qualified educators and administrative staff.
- Demonstrate financial stability and resources for school operations.
- Adhere to all legal and safety norms applicable to residential schools.

Submission Requirements

Interested parties are requested to submit the following:

- A cover letter expressing interest.
- Organization profile or personal credentials.
- Details of past experience in education management.
- Financial proposal and operational plan.

Submission Deadline

All EOIs must be submitted on or before 10th MARCH 2025 to dirminaffairs-ngl@gov.in / minorityaffairsdir@gmail.com

Note: This is an invitation for Expression of Interest and does not constitute a solicitation or offer. Shortlisted candidates will be contacted for further discussions.

Sd/-

(SHASHANK PRATAP SINGH), IAS

Director of Minority Affairs, Nagaland: Kohima

Olympics ayongzüksü renema lir: Amit



Dehradun, Tsüklai/February 14 (Agencies): 38th National Games tembangba sentong Hokulbarnü Dehradun nung alidang tetushi tesemdang ka ama Home Minister Amit Shah-i 2036 küm Olympics takok ngua ayongzüksü linük renema lir ta ashi.

Indian Olympic Association (IOA) tir PT Usha-i iba asayamung tembangba sangdong aser Meghalaya chief minister Conrad Sangma nem nisan amoktsü, kong taruba National Games asayatsü.

"Saisapong nung India tarutsü jenjang tajung lir ta ni tanü ashir. 2036 küm Olympics ayongzüksü asenok renema lir," ta Shah-i iba sentong nung jembidang India-i 2036 küm Olympics ayongzüksü merangba athishia ashi, koba ano tang ang tenzüker.

Hopta ana linük tesem balala nungi asayatem adenshia 38th National Games nung shilem agir nem tenüsang agütsüba

sentong nung Shah den Sports Minister Mansukh Mandaviya dena liasü.

'Dev Bhoomi' ya 'Khel Bhoomi' dangi melenogo, kechiaser National Games ajanga kisung masü saka Games nung asayar temi junga shilem agiba aser Dhami (Uttarakhand CM) ajanga iba asayamung takok ngua ayongzüksü asoshi meranga inyakba ajanga lir," ta Shah-i Indira Gandhi International Sports Complex nung ashi.

"Parnoki meranga inyakba ajanga taoba asayamung nung Uttarakhand jenjang 21 buba nung aliba 7 buba tongogo (overall standings). 'Dev Bhoomi' nungi 'Khel Bhoomi' kumdaktsüba nung yariteper asayar ajunga nem tenüsang agütsür."

"Yangi Games mapang athletes kari records yangluba ya international tournaments den medemdangtsüsa lir," ta Shah-isa ashi.

Iba sentong nung Shah, Mandaviya aser Dhami den Meghalaya CM Conrad Sangma, Uttarakhand Sports Minister Rekha Arya, Indian Olympic Association (IOA) tir PT Usha, boxing asayar tejen MC Mary Kom aser Olympic medallist shooter Gagan Narang nung dena liasü.

"2036 tashinung Olympic indang top 10 telungi India aitsü asoshi ibai tetenzükdak lir. Tangbo linük nung sports ecosystem lir. Saisapong densema lenla ajak nung tejakleni aor," ta Sports Minister Mansukh Mandaviya-ashi.

PT Usha-ia "Indian sports asoshi journey yangi matemer, saka tang ang tenzüker," ta ashi.

January 28 nü tenzüka tesem tenet nung ayongzükba 38th National Games medal tally nung Services Sports Control Board (SSCB) ya tematiba jenjang tongteta medals 121 (gold 68, silver 26, bronze 27) nguteta liasü.

SSCB dang Maharashtra-i medal timba angu 198 (54 gold, 71 silver, 73 bronze), saka gold tajemba anguba ajanga parnok tanabuba jenjang nung tembang.

Haryana-ia Services dang timba medal 153 (48 gold, 47 silver, 58 bronze) angu, saka parnok tasembuba jenjang nung tembang.

Asayamung ayonger Uttarakhand ya jenjang tenet buba nung medal 103 ngur tembang aser yangji gold 24, silver 35 aser bronze 44 liasü.

SA legends cricket team atema Watinungsang assistant coach shim

Dimapur, Tsüklai/February 14 (TYO): Nagaland nungi Watinungsang ya February 22, 2025 nungi March 16, 2025 tashi asayatsü aliba International Masters League nung South Africa Legends team indang assistant coach ama shimogo.

Iba asayamung ya Navi Mumbai, Vadodara aser Raipur nung asayatsü, kong cricket asaya nungi anisüngzüker alir Sachin Tendulkar, Brian Lara, Jonty Rhodes, Makhaya Ntini, Jacques Kallis aser dangar aikati shilem agitsü.

Watinungsang ya ICC certified coach ka lir aser North-east India nungi international



coach ama shimer pa mezügbuba alitsü. Iba alizüng ya region nung cricket asayar asoshi tejak tentetba mapang ka lir.

Pa February 20 nü aotsü lir aser Dimapur District Cricket Association ajanga pa wadang tasenba nung takokba alitsü imlar, ta sangdong ka nung ashi.

PCC nung 1st Creative Arts Fest cum 49th Sports Meet tenzükogo



Dimapur, Tsüklai/February 14 (TYO): Patkai Christian College (PCC) pur "Passion into Action" omen nung ajemdaker 1st Creative Arts Fest tenzükogo, koba Task Force for Music and Arts (TAFMA) den lungjemer Bundrock Auditorium nung February 14, 2025 nü tenzüker.

Iba benjong nung alakteta jaoker Lanutemsu, Principal, Wandering Minds Institute of Fine Art ajanga Nagaland nung inyakyim tasen apiteta inyaktsü nungdakba indang jembia aser lanurtem dang bendanglen maongka bushitsü melen pei tasoli nung pei sempet amshia alitsü ayongzük.

"Bendang lima nungi arua angazüksüsa Nagaland ya kumdaktsütsüla," ta pai ashi.

Anogoshi takum yimya aser sobaliba nung art meyokteptsü tongtipang aser aji asen sobaliba nung shilem

ka kumdaktsütsüla, ta pai ashi.

Sentong nung Post Graduate Students' Welfare Council (PGSWC) tonti zülur Tokhumba Yimchunger-i jembidang, "Iba benjong ya asen tekolok nung bilemba, otsü ashiba, artistic expression benjongba lir," ta ashi.

Iba benjong yagi kaket ken o zülur, performers nem pei sempet sayutsü asoshi sapang agütsütsü aser kati ka ajungmesotsü, ta paisa ashi.

Sentong nung Clark Brothers ajanga temeja ken ka aten aser iba sentong sülen Quiz, Group Song, Just A Minute(JAM), Art, Essay Writing, Poetry Slam, Group Dance, Debate, Mad Ads., aser Fashion Designing amala tetoktepba agia liasü.

Hopta piyong sentong nung house trok-i shilem agitar.

Kohima team-i 12th Nagaland Veterans' Football Tournament kokogo



12 buba Nagaland Veterans' Football Tournament 2025 takok angur Kohima team tangokba noksa ka yangi angur.

Dimapur, Tsüklai/February 14 (TYO): Mhainamtsi Football Ground nung 12 buba Nagaland Veterans' Football Tournament takok ngua February 14, 2025 nü tembangogo.

Iba asayamung ya Peren District Veterans Football Association (PDVFA) ajanga Nagaland Veterans' Football Association (NVFA) ajanga ayonga February 11, 2025 nü nungi asaya aru.

Iba sentong nung tetushi tesemdang ka ama jembidang, asen sobaliba aser yimsü-yimbong wazüka ayutsü nungdaker, saka Naga nungeri metetsümonga kin

telemsa adokdaktsür Naga nunger arogo tejangraba amokbangogo, ta Dr. Tumda Newme, General Secretary Tenyimi Union Nagaland ajanga ashi.

Tribalism ajanga teraksa adokdaktsüba tang manendaktsüra, Nagaland ya sorkaria yimsü mesüteti akumtsü, ta pai ashi.

Anungji NVFA ajanga Naga nunger lokti nung tribalism ajanga timtem adokdaktsüba awareness agütsütsüla, ta pai ashi.

Sentong tenzüka Ilanggwangbe Pastor MBC ajanga sarasadem aser Kenlumyile ajanga temeja

ken ka aten aser Dr. Hedungkiebe, Peren Dist. Representative to NVFA ajanga melepzüng o jembia liasü.

Ajak senteper iba asayamung nung district trok - Kohima, Dimapur, Niuland, Peren, Mokokchung aser Mon nungi shilem agia liasü.

Final match nung Kohima-i Dimapur madak 2-0 agi takok ngua Chanpionship Trophy den senpet sen 50,000 bener ao aser Dimapur-i runners up trophy den senpet sen 30,000 bener ao. Peren ya qualified semi-finalist ama senpet sen 15,000 ngua liasü.

BILEMDANGANG

"Nai anguba ajak nungbo tamang."